



*Rabu, 15 Pebruari 2023*  
**Ogen : Kejadin 12:11-16**



**Seh Kel Jilena**



**J**ujur, kerina kita (diberu) mesikel ikataken mejile. Erbage-bage cara silakoken segelah mejile. Lit deba arah perawaten ku salon, lit ka arah makeken paken-paken si nambahi kinijilen, asesoris-asesoris sipakeken kita pe tujunna guna mejile. Sarai sekalak ndehara. Perbulangenna gelarna Abram. Ia patuh man perbulangenna, ku ja perbulangen ku je ia. Iperentahken Dibata segelah ia nadingken kutana, janah seh me ia i Mesir. I taneh Mesir enda me turah er-ugapa ndia (keraguan) bas pusuh Abraham. Itatapna Sarah seh jilena, mbiar ia arah kinijilen e erbahanca ia ibunuh kari i Mesir. Nina man Sarai segelah iakui ia jadi turangna. Kepeken labo Abaram ngenca ngatakenca Sarai enda mejile. Iidah kalak Mesir Sarai, janah iakuina Sarai seh kel Jilena. I bas mata pegawai istana rikut ras mata raja pe natap maka Sarai tuhu-tuhu mejile. Jelas maka kinijilen Sarai la terjeng iakui jabuna, bangsana tapi kalak sideban, ras raja pe ngakui ia mejile.

Mejile, janah reh jilena jadi sada perayaken, tapi si jadi perenungenta wari enda ula min kinijilen e pesirang kita ras keluarga (Abram ras Sarai) janah mabai kita ku bas dosa (Abram la ngakui Sarai ndeharana). Melala kal waktuta si ipakeken guna pekena-kena kulanta, bas waktu si pakeken e me labo erbahanca lanai lit entah enggo urak waktunta erbagi cerita ras kiniersadan ras jabu. Dekahen salon, belanja-belanja keperluan kinijilen. Entah kinijilen e mpeturah kiniganjangen ukur, "mejile aku segelah aku lebih asangkan kalak sideban," entah "mejile aku segelah terikuti kemajun jaman" piah dungna lanai ngukurken kiningasupen si lit. Mari fokus ku kinijilen pusuh, si la luntur dengen maba kemalem.

*➤ Erlumbalah guna kinijilen pusuh*